

UZEFANIYA

1 Ilizwi likaJehova elafika kuZefaniya
indodana kaKhushi, indodana
kaGadeliya, indodana ka-Amariya,
indodana kaHezekhiya, ekubuseni
kukaJosiya indodana ka-Amoni inkosi
yakoJuda:

Isixhwayiso Ngencithakalo Ezayo

²“Ngizakhucula konke ebusweni bomhlaba,”
kutsho uJehova.

³“Ngizakhucula kokubili abantu lezinyamazana;
ngizakhucula izinyoni zasemoyeni kanye lezinhlanzi zasolwandle.
Ababi bazakuba lezinqwaba zeziucukuphela
lapho ngiqeda abantu ebusweni bomhlaba,”
kutsho uJehova.

Ukumelana LoJuda

⁴“Ngizakwelulela isandla sami koJuda
lakubo bonke abahlala eJerusalema.
Ngizaqeda konke okukaBhali
okuseleyo kule indawo,
amabizo abahedeni labaphristi
abakhonza izithombe
⁵labo abakhothama phezu kwezindlu
bakhonze ixuku lezinkanyezi,
labo abakhothama bafunge ngoJehova,
abafunga langomoleki futhi,
⁶labo ababuyela emuva
bedela ukulandela uJehova
njalo abangamdinganga uJehova
loba babuze ngaye.
⁷Thula phambi kukaJehova
Wobukhosini

ngoba usuku lukaJehova seluseduze.
UJehova uselungise umhlatshelo;
usebangcwelisile labo abanxusileyo.
⁸Ngosuku lomhlatshelo kaJehova
ngizajezisa izikhulu lamadodana
amakhosi labo bonke
labo abagqoke
izigqoko zezizweni.
⁹Ngalolosuku ngizabajezisa
bonke abaxwaya ukunyathela
umbundu
womnyango,
abagcwalisa ithempeli labonkulunkulu
babu
ngodlakela langenkohliso.

¹⁰ “Ngalolosuku,” kutsho uJehova,
“ilizwi lokukhala lizaqonga
ngaseSangweni leNhlanzi,
ukulila kuvelela esiGabeni eSitsha
lomsindo omkhulu wokufohloza uvela
emaqaqeni.

¹¹ Lilani lina elihlala esigodini
sokuthengisela,
bonke abathengisi benu bazaqedwa,
bonke abathengiselana ngesiliva
bazabhujiswa.

¹² Ngalesosikhathi ngizaphenya
iJerusalema ngezibane
ngijezise labo abangakhathaliyo,
abanjengewayini elitshiywe phakathi
kwensipho zalo,
abacabanga bathi,
‘UJehova kayikwenza lutho,
oluhle loba olubi,’

¹³ Inotho yabo izaphangwa,
izindlu zabo zidilizwe.
Bazakwakha izindlu kodwa bangahlali
kuzo;
bazahlanyela izivini,
kodwa iwayini bangalinathi.

Usuku Olukhulu LukaJehova

¹⁴ “Usuku olukhulu lukaJehova seluseduze – seluseduze njalo luza ngokuphangisa.

Lalelani! Ukukhala ngosuku lukaJehova kuzakuba buhlungu, lokuklabalala kwebutho khonapho.
¹⁵ Lolosuku luzakuba lusuku lolaka, usuku losizi lokudabuka; usuku lokuhlupheka lokuchitheka, usuku lomnyama lokudana, usuku lwamayezi lobumnyama,
¹⁶ usuku lwecilongo lokuhlabu umkhosi wokulwa impi lamadolobho avikelweyo kanye lezinqaba zasemajikweni.
¹⁷ Ngizaletha usizi ebantwini njalo bazahamba njengeziphofu, ngoba bonile kuJehova.

Igazi labo lizachithwa njengothuli lezibilini zabo njengamanyala.

¹⁸ Isiliva sabo loba igolide labo kakuyikwanelisa ukubasindisa ngosuku lolaka lukaJehova. Umhlabu wonke uzatshiswa emlilweni womona wakhe ngoba uzakwenza isiphetho ngokuphangisa kubo bonke abahlala emhlabeni.”

2 Buthanani ndawonye, buthanani ndawonye, wena sizwe esiyangisayo, ² isikhathi esimisiweyo singakafiki losuku ludlule njengamakhoba, ukuthukuthela okwesabekayo kukaJehova kungakafiki kuwe, usuku lolaka lukaJehova lungakafiki kuwe.

³ Dingani uJehova, lonke lina abathobekileyo belizwe, lina elenza lokho akulayayo.

Dingani ukulunga, dingani ukuthobeka; mhlawumbe lingavikelwa ngosuku lwentukuthelo kaJehova.

Ukumelana LeFilistiya

⁴ IGaza izadelwa le-Ashikheloni isale isingamanxiwa.

abantu base-Ashidodi bazaxotshwa emini,

le-Ekhroni isitshulwe.

⁵ Maye kini lina elihlala ngasolwandle, lina sizwe samaKherethi; ilizwi likaJehova limelana lani, wena Khenani, lizwe lamaFilisti.

“Ngizakutshabalalisa, njalo kakho ozasala.”

⁶ Ilizwe elingasolwandle, lapho okuhlala khona amaKherethi, lizakuba yindawo yabelusi lezibaya zezimvu.

⁷ Lizakuba ngelabaseleyo abendlu kaJuda; bazathola amadlelo khona. Kusihlwa bazalala phansi ezindlini zase-Ashikheloni.

UJehova uNkulunkulu wabo uzabalondoloza; uzabenza baphumelele futhi.

Ukumelana LeMowabi

⁸ “Ngizizwile izithuko zeMowabi lokuchothoza kwama-Amoni, abathuka abantu bami besongela lelizwe labo.

“Ngakho ngeqiniso elinjengoba ngikhona,”

kutsho uJehova uSomandla,
uNkulunkulu ka-Israyeli,
“impela iMowabi izakuba
njengeSodoma,
ama-Amoni abe njengeGomora –
indawo yokhula lemigodi yetshwayi,
ilizwe elichithekileyo nini lanini.
Abaseleyo babantu bami bazabaphanga;
abaphephileyo babantu bami
bazathatha
ilizwe labo.”

¹⁰ Lokhu yikho abazakuthola
kungumvuzo wokuzigqaja kwabo,
ngenxa yokuthuka lokuklolodela
abantu
bakaJehova uSomandla.
¹¹ UJehova uzakwesabeka kubo
lapho esetshabalalisa bonke
onkulunkulu belizwe.
Izizwe ezisemakhunjini wonke
zizamkhonza,
ngulowo elizweni lakhe.

UKumelana LeKhushi

¹² “Lani futhi, lina maKhushi
lizabulalwa ngenkemba yami.”

Ukumelana Le-Asiriya

¹³ Uzakwelulela isandla sakhe
enyakatho achithe i-Asiriya,
atshiye iNineve itshabalele
ngokupheleleyo
njalo yome njengenkangala.
¹⁴ Imihlambi yezimvu leyezinkomo
izalala phansi khonapho,
lezidalwa zezihlolo zonke.
Isikhova senkangala lomandukulo
kuzahlala ezinsikeni zakhe.
Ukukhala kwazo kuzankenketha
emawindini,
imfucuza izakuba eminyango,

imijabo yemisedari ichayekе.
¹⁵ Leli lidolobho elingakhathaliyo
elalizihlalele livikelekile.
Lazitshela lathi:
“Ngiyimi, kakho omunye ngaphandle
kwami.”
Yeka ukuchitheka eseliyikho,
isikhundla sezinyamazana zeganga!
Bonke abadlula kulo bahleka usulu
balikhombe ngenqindi.

Ikusasa LeJerusalema

3 Maye kulo idolobho labacindezeli,
elihamukayo lelingcolileyo!
² Kalilaleli muntu, kalivumi kukhuzwa.
Kalithembeli kuNkulunkulu.
Kalisondeli kuNkulunkulu walo.
³ Izikhulu zalo ziyizilwane
ezibhongayo,
ababusi balo bazimpisi zakusihlwa,
ezingatshiyi lutho lwekuseni.
⁴ Abaphrofethi balo bayazazisa;
bangabantu bamacebo amabi.
Abaphristi balo bangcolisa indawo
engcwele bephule lomthetho.
⁵ UJehova phakathi kwalo ulungile;
kenzi okubi,
nsuku zonke ekuseni wenza imfanelo
yakhe njalo kaphuthi ukusa kwamalanga
wonke,
ikanti abangalunganga kabalanhloni.

⁶ “Ngizichithile izizwe;
izinqaba zazo zidiliziwe.
Ngitshiye imigwaqo yazo ideliwe
kungekho odlula khona.
Amadolobho azo adiliziwe;
kakho ozasala – kakho lamunye.
⁷ Ngathi kulo idolobho,
‘Impela uzangesaba uvume
ukukhuzwa! ’

Lapho-ke indlu yalo yokuhlala
yayingayikudilizwa

loba isijeziso sami sehlele phezu
kwalo.

Kodwa babelokhu betshisekela
izenzo zokuxhwala kukho konke
abakwenzayo.

⁸ Ngakho ngilindela,” kutsho uJehova,
“lolusuku engizasukuma ngalo
ngifakaze.

Sengimise ukubuthanisa izizwe,
ngiqoqe imibuso, ngehlisele ulaka
lwami

phezu kwabo – konke ukuthukuthela
kwami okukhulu.

Umhlabo wonke uzaqothulwa
ngomlilo womona wentukuthelo yami.

⁹ “Lapho-ke ngizahlambulula izindebe
zezizwe,

ukuze zonke zikhuleke ebizweni
likaJehova

zimkhonze zimanyane.

¹⁰ Kusukela ngaphetsheya kwemifula
yaseKhushi

abakhonzi bami, abantu bami
abahlakazekileyo,
bazangilethela iminikelo.

¹¹ Ngalolosuku kaliyikuyangiswa
ngobubi bonke elabenza kimi,
ngoba ngizababusisa
kulelidolobho abathokoziswa
yikuzigqaja kwabo.

Kaliyikuzikhukhumeza futhi entaben
yami engewe.

¹² Kodwa ngizatshiya phakathi kwenu
abathambileyo labathobekileyo,
abathembele ebizweni likaJehova.

¹³ Abako-Israyeli abaseleyo
kabayikwenza okubi;
kabayikuqamba amanga,
loba kube lenkohliso emilonyeni yabo.
Bazakudla balale phansi,

kakho ozabenza besabe.”

¹⁴ Hlabela wena Ndodakazi yeZiyoni,
klabalala kakhulu, wena Israyeli!

Thaba uthokoze ngenhliziyo yakho
yonke

wena ndodakazi yaseJerusalema!

¹⁵ UJehova usesisusile isijeziso sakho,
usesixotshile isitha sakho.

UJehova, uJehova ka-Israyeli, ulawe;
akulangozi ozaphinda uyesabe futhi.

¹⁶ Ngalolosuku bazakuthi kulo
iJerusalema,

“Ungesabi, wena Ziyoni;
ungavumeli ukuba izandla zakho zibe
buthakathaka.

¹⁷ UJehova uNkulunkulu wakho ulawe,
ulamandla okusindisa.

Uzathokoza kakhulu ngawe,
uzakududuza ngothando lwakhe,
uzakuthokozela ngokuhlabela.”

¹⁸ “Izinsizi zemikhosi emisiweyo
ngizazisusa kuwe;

zingumthwalo lehlazo kuwe.

¹⁹ Ngalesosikhathi ngizababona
bonke abalicindezelayo;
ngizahlenga abaqhulayo
ngibuthe lalabo abahlakazwayo,
ngizabapha udumo lenhlonipho

kuwo wonke amazwe lapho
abahlaziswa khona.

²⁰ Ngalesosikhathi ngizalibutha;
ngalesosikhathi ngizalisa ekhaya.

Ngizalipha inhlonipho lodumo
phakathi kwezizwe zonke
zasemhlabeni

lapho sengiliphumelelisa futhi
phambi kwamehlo enu uqobo,”
kutsho uJehova.